

光緒江西通志

江西通志卷一百二十六

宦績錄一統轄

漢 吳增

灌嬰睢陽販網者也高帝爲沛公嬰以中涓從擊項籍垓下至東城破之盡得其軍渡江破吳郡長吳下得吳

守遂定吳豫章會稽郡封潁陰侯

漢書 許案灌嬰并江西之官定郡築城

事已分見前事勝蹟二略然至今南昌有灌城之號又定祀嬰爲城隍之神是其開闢榛莽實此維都二千年來實如飲食之必祭先祖故依舊志仍以嬰爲宦績託始其漢以後豐功偉節著於是邦者雖官非守土亦悉援嬰例錄焉

何武字君公蜀郡郫縣人舉賢良方正徵對策拜諫議大夫遷揚州刺史所舉奏二千石長吏必先露章服罪者爲除免之而已不服極法奏之抵罪或至死以是郡

國各重其守行部必先卽學官見諸生試其誦論得失  
然後入傳舍問懇田頃畝五穀美惡率以爲常五歲入  
爲丞相其所居亦無赫赫名去後常見思

漢書

巴祇爲揚州刺史在官不迎妻子俸祿不使有餘帑毀  
壞不復改易以水澡傳墨用之夜與士對坐暗中不然

官燭

據太平御覽二百五十  
六引謝承後漢書補

晉

華軼字彥夏平原人永嘉中歷振威將軍江州刺史雖  
逢喪亂每崇典禮置儒林祭酒以宏道訓威惠並行得  
江表歡心士赴之如歸時四方瓦解軼有匡天下之志  
每貢獻入洛不失臣節謂使者曰若洛都道斷可輸之  
琅邪王以明吾之爲司馬氏也

晉書

應詹字思遠汝南南頓人明帝時遷使持節都督江州諸軍事平南將軍江州刺史時王敦新平人情未安詹撫而懷之莫不得其歡心百姓賴之

晉書

王彬字世儒琅邪臨沂人爲豫章太守爲人樸素方直乏風味之好雖居顯位常布衣蔬食遷前將軍江州刺

史

晉書

溫嶠字太真太原祁人咸和初爲江州刺史持節都督豫章等十郡軍事甚有惠政蘇峻反嶠率師赴難灑泣登舟與陶侃合兵擊峻斬之拜驃騎將軍開府儀同三司當陳豫章十郡之要宜選單車刺史別撫豫章專理黎庶詔不許卒年四十二江州士庶聞之莫不相顧而泣謚忠武葬豫章城南後其子載喪還都葬建平陵北

晉書

庾翼字稚恭潁川鄆陵人亮弟除振威將軍鄱陽太守撫和百姓甚得歡心及亮卒授都督江荆等六州軍事時人以年少易之翼每竭智能勞謙匪懈戎政嚴明數年之間公私充實人情翕然稱其才幹翼兄冰字季堅以雅素垂風兄亮嘗稱爲庾氏之寶康帝卽位進車騎將軍會翼當伐石季龍冰代督江荆諸軍領江州刺史鎖武昌尋卒謚曰忠成

王羲之允之俱琅邪臨沂人羲之字逸少起家祕書郎征西將軍庾亮請爲參軍亮臨薨上疏稱羲之清貴有鑒裁遷甯遠將軍江州刺史允之字深猷咸康中亦以南中郎將遷江州刺史莅政甚有威惠

晉書

褚裒字季野河南陽翟人成帝時爲豫章太守時庾亮鎮江州大會州人士裒問亮聞江州有孟嘉其人何在亮曰在坐卿但自覓嘉坐次甚遠裒歷觀指嘉曰此君小異將無是乎亮嘉裒得嘉益奇嘉爲裒所得逾器重焉累遷侍中尙書除江州刺史在官清約雖居方伯恆使私童采樵

晉書

桓沖字幼子譙國龍亢人淹識有武幹兄溫甚器之從溫征伐有功遷振威將軍江州刺史在江州凡十年而溫薨詔沖爲中軍將軍都督揚江豫三州軍事累遷都督江荆梁益甯交廣七州沖旣莅事盡忠王室或勸沖誅除時望專執權衡沖不從卒年五十有七諡曰宣穆

晉書

桓伊字叔夏譙國鉅人以破苻堅功封永修縣侯桓沖卒遷都督江荆豫等十四郡軍事江州刺史假節到鎮以邊境無虞宜務寬恤疏言江州虛耗加速歲不登今餘戶有五萬六千宜并合小縣除諸郡逋米移州還鎮豫章詔令移州尋陽其餘皆聽之伊隨宜撫綏百姓賴焉卒諡曰烈

晉書

劉敬宣彭城人牢之長子也元興三年遷建威將軍江州刺史鎮尋陽課集軍糧按召舟乘軍戎要用常有儲擬桓元子亮寇豫章又遣苻宏寇廬陵敬宣並討破之

晉書

一統志

何無忌東海郊人也忠亮任氣義熙中爲都督江荆二州江夏等八郡軍事加散騎侍郎進號鎮南將軍時盧

循遣其黨徐道覆順流而下無忌將率眾拒之長史鄧  
潛之力諫無忌不從會西風暴急賊乘風以大艦偏之  
眾奔敗無忌厲聲曰取我蘇武節來節至躬執督戰賊  
眾雲集辭色不撓遂握節死之謚曰忠肅晉書  
詳案晉書有郗鑒庾亮二傳鑒所都督之江西非今地  
詳詳職官表亮則於江西無所表見且蘇峻之亂由亮  
迫致豈能與溫嶠同論  
今與郗鑒傳並從刪汰

宋

王宏字休元琅邪臨沂人宋國初建爲尚書僕射義熙  
十四年遷監江州豫州之西陽新蔡二郡諸軍事撫軍  
將軍江州刺史省賦簡役百姓安之至宋元嘉中政監  
爲都督後徵司徒侍中進位太保卒於位宋書  
在晉末然位江州最久又在宋  
國既建之後故依舊志列宋代  
謹案

檀道濟高平金鄉人詔少弟文帝元嘉三年遷征南大將軍開府儀同三司江州刺史道濟立功前朝威名甚重朝廷疑畏之十二年魏軍南伐召道濟入朝明年春遣還鎮會上疾動召入祖道收付廷尉及其子竝誅時人歌曰可憐白浮鳩枉殺檀江州

宋書

王元謨字彥德太原祁人南郡王義宣與江州刺史臧質反朝廷假元謨輔國將軍爲前鋒南討大破之明帝卽位除車騎大將軍江州刺史

宋書

謝志原案王宏檀道濟王元謨安志入

九江白志改定

齊

陳顯達南彭城人也永明八年出爲征南大將軍江州刺史謙厚有智計自以人微位重每遷官常有愧懼之

色戒其子勿以富貴凌人

南齊書

鄭紹叔字仲明滎陽開封人高祖爲雍州刺史紹叔開道西歸補甯蠻長史義師起爲冠軍將軍改驍騎將軍侍從東下留監江州事都督江湘二州糧運事無缺乏高祖甚親信之

梁書謹案紹叔監江州尙在齊中興之世梁武帝未受命以前安志列齊不誤謝志改入梁代轉失斷限今仍從安志

梁

王茂字休遠太原祁人梁高祖東下茂爲軍鋒江州刺史陳伯之叛以茂都督江州諸軍事江州刺史南討伯之伯之敗奔魏時新離兵寇民思反業茂務農省役百姓安之天監十二年再爲刺史在州不取奉獄無滯囚居處佩服同於儒素視事三載薨於州

梁書一統志

蕭秀字彥達太祖第七子也天監六年出爲都督江州  
諸軍事平南將軍江州刺史至州聞前刺史取徵士陶  
潛曾孫爲里司秀歎曰陶潛之德豈可不及後世卽日  
辟爲西曹時盛夏水泛津梁斷絕外司請依舊僦渡收  
其價直秀曰刺史不德水潦爲患可利之乎給船而已

梁書

王僧辯字君才太原祁人神念之子天監中隨父來奔  
侯景西寇僧辯頻戰挫賊世祖以爲征東將軍開府儀  
同三司江州刺史於是命僧辯沿流討景至湓口與陳  
霸先會白茆洲升壇歃血誓共滅景戰石頭城北大敗  
之

梁書

隋

杜彥雲中人開皇中拜洪州總管甚有治名又有蘇孝

慈者扶風人仁壽初爲洪州總管有惠政後平桂林山

越之亂卒於官

一統志 隋書 謹案杜彥舊志無傳今據一統志補

豆盧通字平東昌黎徒河人宏厚有器局開皇中爲洪

州總管以寬惠稱十七年卒官諡曰安

隋書 謹案蘇孝慈豆盧通兩

傳舊志列南呂府然總管之職與刺史不同今改隸於此

### 唐 吳南唐附

李大亮京兆涇陽人

舊唐書雍州涇陽人

有文武才略武德五年

以安撫使宣慰江南靖州其所置也嘗徇廣州至九江

聞輔公祏反以計禽其將張善安大亮性忠謹外若不

能言而內剛烈不可干以非位通顯居陋狹甚初破公

祏以功賜奴婢百口謂曰而曹皆衣冠子女不幸破亡

吾何忍錄而爲隸乎縱遣之高祖聞而咨美更賜俚婢

二十

唐書李太亮傳

樂史太平寰宇記

謹案太亮

爲安撫使宣慰江南其時江南未分西道太亮正當入

江西職官也舊通志僅據新唐書本傳未及參考他書

致有終身未莅洪

都之疑今訂正

黃長公武德八年爲江南安撫使時屬寇憑凌土虛民

徙長公奔車入境招懷流散襁負而來未及朞年民庶

安集

嘉靖林志

李行休高宗時鎮洪州下車踰月虛心禮賢流亡歸附

歲旱精誠禱神膏雨下降

嘉靖林志

張休字祥幽州范陽人上元閒以衛尉卿爲都督有遺

愛於民及移廣州民猶思之

嘉靖林志

舊志原案明

人愛之如父母

道變頌

狄仁傑字懷英并州太原人也垂拱中以冬官侍郎持

節江南巡撫吳楚之俗多淫祠仁傑一切禁止天授二

年以地官侍郎同鳳閣鸞臺平章事爲來俊臣所構貶

彭澤令邑人爲置生祠

新舊唐書紀傳九江府志仁傑乞免民租疏引

謹案舊志引

曰彭澤水鄉百姓齊營水田臣方到縣百姓告歉皆云

春夏以來放無霖雨營佃失時竊見彭澤地狹山峻常

年糴得全熟納官之外半載無糧今總不收將何活路

官吏不敢自裁謹以奏聞武后嘉仁傑憂民特降制江

州蠲免本縣租稅仁傑又有縱囚令如

期而還事百姓德之唐書本傳失載

馬懷素字惟白潤州丹徒人神龍二年以十道使黜陟

江西處決平恕

唐書儒學傳

張九齡字子壽一名博物曲江人開元十五年以太常

少卿出爲冀州刺史母老改洪州都督有治聲歲旱禱

雨輒應嘗立碣表徐孺子墓歷尙書右丞相罷政事卒

諡文獻

新舊唐書  
南昌府志

班景倩衛州汲人開元閒初置江南西道采訪使治洪

州景倩首拜是命綽有風力期年閒罷免賊吏百餘人

嘉靖林志

謹案景倩爲班宏之父附見宏傳新舊唐

書均不言爲江西采訪使舊志未知據何書錄人附注

攷俟

韋元甫爲洪吉都防禦觀察使

原作洪州都督防禦觀察使與唐書官制不合

今改

兼御史中丞時淮泗靡甯夷夏震動元甫克振遠

略靖難勤王楚氛埽除江界底定

嘉靖林志

李勉字元卿鄭王元懿曾孫也自西臺除江西觀察使

賊帥陳莊連陷江西州縣偏將呂太一武日昇相繼背

叛勉與諸道力戰悉討平之部民有父病爲蠱道求厭

者以木偶人署勉名埋之掘治驗服勉曰是爲其父則

孝也縱不誅入爲京兆尹歷廣州刺史拜平章事

新舊唐書

張鎬字從周博州人代宗初爲撫州刺史遷洪州觀察

使臨海賊袁愷寇東境江介震騷鎬遣兵屯上饒斬首

二千級又襲舒城賊楊昭斬之沈千載者新安大豪連

結椎剽州縣不能禽鎬遣別將盡殄其眾改江南西道

觀察使

唐書

舊志引文苑英華獨孤及洪州刺史張公遺愛頌云寶應元年冬十月公受命至自臨

川彰善用明辯惡用威一法度用信布德惟用德是歲

也二吳饑人相食張出乃僚必國之良有若博陵崔賁

牙之境疵癘不作惟當北海王士華河間邢由河東裴

昌黎韓洄趙郡李惟岳北海王士華河間邢由河東裴

孝智隴西李道以嘉言頌盡多公軍事洽清之內無濁

流密克之下無冤民在郡十有一載享壽六十有一歲

薨於位

韓洄字幼深京兆長安人洪州刺史張鎬以故相鎮江

西奏授洄本州長史莫徯副使懷徠夷落嚮方率教尋

充江西都團練判官軍州庶政多所訪決歲餘鎬終於位洄以上介領留務時吳楚剽輕法禁未一每長吏受代人心輒搖洄臨以威重撫以慈惠用能輯安封部以待守臣

權德輿所撰行狀

魏少游邢州鉅鹿人大厯二年爲江西觀察使進刑部

尙書少游雖無赫赫名然善任人緣飾規檢果於集事

有足稱者

新舊唐書

舊志原案林志稱少游決獄如神明示升黜蠲除疾苦定賦稅之差勸簿書

之役事有條理人皆便安

李泌字長源京兆人代宗立爲翰林學士元載惡其不

附己因江西觀察使魏少游請僚佐載稱泌才以試泌

書少監充江西觀察判官載誅召還

新舊唐書

謹案李泌爲魏少游僚

佐史傳雖不詳政績然少游治江西有聲且以能任人名則贊襄之力泌實有之故依舊志錄入

路嗣恭字懿範京兆三原人大厯六年出爲江西觀察使在官恭恪善治財賦賈明觀者事北軍都虞候劉希暹魚朝恩誅希暹從坐明觀積惡犯眾怒宰相元載受賂遣效力江西魏少游承載意苟容之及嗣恭代少游

即日杖殺識者稱之

新舊唐書 嗣恭初名劒客後賜今名

王緯字文卿太原人大厯中與李泌俱爲路嗣恭江西觀察判官泌見惡於元載嗣恭希意欲殺之緯護解僅免泌執政奏進緯給事中累遷諸道鹽鐵使所至以清

白名

唐書

張鑑字季權一字公度吳人江西觀察使到郡之日振孤獨均賦稅存問羸老厚其粟帛然後興舉學政激厲

浮俗人謂其識治體云

嘉靖林志

鮑防字子慎襄州襄陽人爲御史大夫歷江西觀察使  
召拜左散騎常侍終工部尙書防在江西崇儒勸學士  
業有成實貢者給資遣之民悅其化

唐書 嘉  
靖林志

李皋字子蘭曹王明元孫嗣王戢之子天寶十一載嗣  
封建中三年李希烈反自湖南遷江西節度使至州大  
令將吏曰有功未申與懷器謀不發者皆自言得裨校  
伊慎王鐸李伯潛等悉補大將治戰艦裒兵二萬教以  
兵法屢破賊時朝廷仰食江淮西道出九江至大別皆  
與賊接皋轉戰數千里饒路遂通江漢倚之爲固累遷  
荆南節度使徙鎮山南東道皋性勤儉知人疾苦能參  
聽持將吏短長賞罰必信所至常平物價豪家不得擅  
其利有所造作皆用省而利長以物遺人必自視衡量

官匹帛皆印之絕吏之私卒年六十贈尚書右僕射謚

曰成

新舊唐書

盧羣字載初范陽人建中末詔諸將討李希烈以羣爲監察御史江西行營糧料使興元元年嗣曹王皋節度江西奏爲判官幕府之事委以咨決以正直聞入拜侍

御史

新舊唐書

李兼

舊唐書齊映傳作李兼德宗紀作謙

貞元元年自鄂岳移鎮江西屬

淮西亂後編戶蕩析兼至撫之三年歸者增籍五千人

洪州山水暴漲浸城郭壞廬舍兼率將吏負土囊以遏

之卒免水厄

嘉靖志

裴胄字允叔河東聞喜人德宗朝爲江南西道觀察使前使李兼營罷南昌卒千餘人收資廩爲月進胄至白

罷之樊澤徙襄州宰相議所代德宗雅記胄才遂拜荆

南節度使

新舊唐書

李巽字令叔趙州贊皇人貞元十三年

新唐書本傳作貞元五年誤今

從舊書

徙江西觀察使加檢校散騎常侍兼御史大夫

德宗紀異銳於爲治持下以法察無遺私吏不敢少給順宗立

擢兵部侍郎

新舊唐書

韋丹字文明京兆萬年人少孤從外祖顏真卿學擢明

經復舉五經高第元和二年徙江南西道觀察使治洪

州始民不知爲瓦屋草茨竹椽久燥則戛而焚丹召工

教爲陶聚材於場度其費爲估不取贏利人能爲屋者

受材瓦於官免半賦徐取其償逃未復者官爲爲之貧

不能者畀以財身往勸督置南北市爲營以舍軍歲中

旱募人就工厚與直給其食爲衢南北夾兩營東西七里以廢倉爲新廩馬息不死築隄扞江長十二里竇以疏漲凡爲陂塘五百九十八所灌田一萬二千頃有吏至倉十年亡糧三千斛丹籍其家盡得文記乃權吏所奪丹召諸吏曰若恃權取於倉罪也與若期一月還之皆頓首謝及期無敢違者有卒違令當死釋不誅去上書告丹不法詔丹解官待辨會丹卒年五十八驗卒所告皆不實丹治狀愈明太和中裴誼觀察江西上言爲丹立祠堂刻石紀功不報宣宗讀元和實錄見丹政事卓然他日與宰相語元和時治民孰第一周墀對臣嘗守江西韋丹有大功德被八州歿四十年老幼思之不忘乃詔觀察使上丹功狀刻於碑

唐書

王仲舒字宏中并州祁人穆宗初除江西觀察使初江西權酒利多他州十八民私釀歲抵死者不絕穀數斛始易斗酒仲舒罷酤錢九十萬吏坐失官息錢五十萬悉產不能償仲舒焚簿書脫械不問水旱民賦不入爲出錢二十萬代之有爲佛老法興浮屠祠者皆驅出境卒於官年六十二贈左散騎常侍諡曰成

唐書舊志

奇神道碑銘云仲舒觀察三年法大成錢餘於庫粟餘於廩人享於田廬謠謠於道途天子復思且徵以代虛吏部左丞位以待之長慶三年十一月十七日薨於洪州

殷侑陳州人幼有志於學不治貲產長通經術貞元末

擢太常博士寶曆元年爲江西觀察使以潔廉稱

唐書

沈傳師字子言吳人以尙書右丞出爲江西觀察使徙

宣州傳師於吏治明吏不敢罔愼重刑法每斷獄召幕

府平處輕重盡合乃論決故所益以廉靖聞

唐書

周墀字德升汝南人會昌六年十一月遷江西觀察使  
施展教令申明約束發戍守陳弇贓罪捕獲劇賊劉大  
朴等出兵戍彭蠡東口上下千里無一賊迹進拜義成

軍節度使

新舊唐書  
杜輿川集

韋宙京兆萬年人丹子以蔭爲河南府司錄參軍宣宗  
問周墀曰丹有子否墀以宙對拜侍御史出爲永州刺  
史還爲大理少卿久之拜江西觀察使爲政簡易南方

以爲世官

唐書

秦裴愼縣人少驍勇隸楊行密帳下以功授諸軍都尉  
加昇州刺史天祐三年洪州鍾傳卒州人立其子匡時  
傳養子江州刺史延規忿不得立以其郡納款因授裴

西南面行營招討使攻匡時至蓼州分軍晨出盡銳破柵未幾城陷擒匡時以獻號令嚴肅兵士無敢殺戮洪之士卒俱來就營求其戚屬爲出府帛贖還之洪人感

悅授洪州制置使

據宋路振九國志補

林仁肇建陽人剛毅有膂力姿質偉岸文身爲虎因謂之林虎兒初爲閩將閩亡歸南唐乾德三年以仁肇爲洪州節度使仁肇出於偏伍雖在將帥之位常與士卒均食同服故得士心與皇甫繼勳朱全贇不協因搆仁肇求援皇朝欲自王江西後主遣人酖殺之

馬令南唐書

宋

張鑑字德明涿州范陽人以父蔭補供奉官太平興國三年擢進士第拜監察御史奉詔決獄江右頗雪冤滯

歷殿中侍御史判三司度支憑由催欠司王明李惟清  
薦其能用爲江南西道轉運使本部有大姓爲民患者  
鑑以名聞太宗盡令部送魁首及妻子赴闕以三班職  
名羈縻之江左震肅又建議割瑞州清江吉州新淦袁  
州新喻三縣置臨江軍時以爲便召還特被慰獎景德

初卒

宋史

張齊賢字師亮曹州冤句人進士太平興國六年爲江  
南西路轉運副使尋加正使齊賢至官詢知饒信虔州  
土產銅鐵鉛錫之所推求前代鑄法取饒州永平監所  
鑄以爲定式歲鑄五十萬貫凡用銅八十五萬斤鉛三  
十六萬斤錫十六萬斤詣闕面陳其事敷奏詳確議者  
不能奪先是諸州罪人多錮送闕下路死者十常五六

齊賢道逢南劍建昌虔州所送索牒視之率非首犯悉伸其冤抑因力言於朝後凡送囚至京請委強明吏慮問不實則罪及原問官屬自是江南送罪人者爲減大半江南諸州小民居官地者有地房錢吉州緣江地雖淪沒猶納勾欄地錢編木而浮居者名水場錢皆前代弊政齊賢悉論免之初李氏據有江南民戶稅錢三千已上者戶出一人黥面自備器甲輸官庫出卽給之日支糧二升名義軍旣內附皆放歸農至是言者欲復選充軍伍齊賢上言江南義軍例皆良民橫遭黥配克復之後便放歸農竝皆樂業若逐戶搜索不無驚擾法貴有常政尙清淨不若且仍舊貫從之齊賢居使職勤究民弊務行寬大江人思之不忘

宋史

范正辭字直道齊州人治春秋公羊穀梁登第太平興國中爲殿中丞出知饒州時州多滯訟正辭至宿繫皆決遣之胥吏坐淹獄停職者六十三人會詔令料州兵送京師有王興者懷土憚行以刃故傷其足正辭斬之興妻詣登聞上訴太宗召正辭廷辨其事正辭曰東南諸郡饒爲盛興敢動搖人心苟失控馭臣無待罪之地矣上壯其敢斷特遷膳部員外郎充江南轉運副使賜錢五十萬饒州民甘紹者積財鉅萬爲羣盜所掠州捕繫十四人獄具常死正辭按部至引問之囚皆泣下察其非實命徙鞠他所旣而民有告羣盜所在者潛召監軍王愿掩捕之未至盜已遁正辭單騎出郭二十里迫及之賊控弦持稍來偪正辭大呼以鞭擊之中賊雙目

執之得所棄賊賊自刃不殊尙有餘息正辭卽載歸令

醫傅藥創愈按法効治而十四人者皆得生

宋史

許驤字允升薊州人卜居睢陽太平興國元年進士雍熙二年改江南轉運副使洪吉上供運船水損物主吏懼罪故覆舟鞠獄者案以欺盜當流死者數百人驤馳往訊得其情實以聞多獲輕典優詔褒之又上言劫盜配流遇赦得原還本鄉讐告捕者多所殺害自今請以隸軍詔可遷正使

宋史

楊允恭漢州綿竹人太宗時爲廣連都巡檢使以海鹽盜入嶺北民犯者眾請建大庾縣爲軍官輦鹽市之詔建爲南安軍自是冒禁者少時緣江多賊命督江南水運因捕寇黨行及臨江軍擇驍卒拏輕舟伺下江賊所

止夜發軍城三鼓遇賊百餘拒敵久之悉梟其首又趣  
通州境躡海賊擒數百人自是江路無剽掠之患以功  
轉洛苑副使江淮兩浙都大發運擘畫茶鹽捕賊事旋  
爲發運使改擘畫爲制置允恭與

鹽之任多作條制遂變新法眞宗時累官荆湖江浙都

巡檢使

據宋史本傳補

謹案南宋建軍之議出自允恭舊志不爲立傳始以非江西官故然其後官

江淮發運使則江西亦在轄中特授入表竝補傳以存其蹟亦舊志秩官名宦竝錄江淮招討使張俊例也

任中正字慶之曹州濟陰人進士及第爲江南轉運副  
使至部歲大稔民出租賦平糴皆盈羨發運使王子興  
欲悉調饗京師中正曰東南歲輸五百餘萬而江南所  
出過半今歲有餘或歲少歉則數不登患及吾民矣乃

止

宋史

夏侯嶠字峻極其先幽州人家濟州鉅野太平興國初  
舉進士甲科雍熙中自莫州徙知洪州改起居郎真宗  
咸平二年爲翰林侍讀學士兼祕書監是秋江浙饑命  
爲江南巡撫使所過疏理刑訟存問耆老務從寬簡人  
以爲便使還采病民二十餘事上之亟詔釐革據宋史本傳南  
昌府志補謹案宋史地理志太平興國元年江南分  
東西路未幾并爲一至真宗天禧四年乃復分之是咸  
平時之江表固兼有西路非不關江西也南昌府舊志  
不明因革之由乃於嶠傳江南巡撫改爲江西巡撫殆  
近於不知而作矣今  
依史傳原文訂正

王濟字巨川深州饒陽人大中祥符三年知洪州兼江  
南西路安撫使屬歲旱民饑躬督官吏爲糜粥日親賞  
而給之錄饑民爲州兵全活甚眾宋史

張傅字巖卿亳州譙人進士及第真宗時提點江西刑

獄強力治事所至審覈簿書勾摘奸隱州縣憚之傅曰  
吾所以事事致察者正以愛州縣也吏不敢慢則州縣  
不復犯法矣人亦以爲然

宋史

凌策字子奇宣州涇人雍熙二年舉進士洪州水知州  
李元以疾求代上與宰相歷選朝士以策代之王旦言  
策莅事和平可寄方面卽授江西轉運使饒州產金常  
禁商市鬻或有論告逮繫滿獄策請縱民販市官責其  
等人甚便之五年召還

宋史

張士遜字順之陰城人涇化進士爲監察御史中書掾  
人充江南轉運使再擬輒見郤帝獨用士遜再遷侍御  
史

宋史 舊志原案宋史本傳士遜任江南時無政  
事可見而史論稱其練習民事風蹟可紀故錄之

孫抗字和叔黟縣人進士甲科仁宗時以尙書都官員

外郎提點江南西路刑獄有言常平歲凶當稍貴其粟以利糴本者詔已從之抗言此非常平本意也事遂得寢抗爲政整齊其大體闊略其細故與賓客談說並歌飲酒往往終日而能聽用佐屬盡其力事以不廢

宋王安石

廣西轉運使孫君稟神

譚案舊志宋嘉祐林志語焉不詳今改引王荆公集

周湛字文淵鄧州穰人進士甲科知虔州提點廣南東路刑獄尋爲江南西路轉運使州縣簿領案牘淆混無紀次且多亡失民訴訟無所質至久不能決湛爲立號以日月比次之詔下其法諸路又以徭賦不均百姓巧於避匿因條其詭名挾佃之類十二事且許民自言凡括隱戶三十萬湛治煩劇能得其要所至喜條上利害前後至數十百事天資強記吏胥滿前一見輒識其姓

名云

宋史

劉夔字道元建州崇安人進士中第補廣德軍判官累遷江西兩浙淮南轉運使所至有廉名常過江東見二囚繫累年矣問之曰前此殺吉州掾徐咸疑二人者夔爲言於朝釋之後果得眞盜

宋史

程師孟字公闢吳人進士甲科累知南康軍楚州提點夔路刑獄爲度支判官知洪州積石爲江隄浚章溝揭北牖以節水升降後無水患累官江西轉運使盜發袁州州吏爲耳目久不獲師孟械吏數輩送獄盜卽成擒爲政簡而嚴罪非死者不以屬吏發隱摘伏如神得豪惡不逞者必痛懲艾之至勦絕乃已所部肅然民爲立

生祠

宋史

張洞字仲通開封祥符人舉進士中第出爲江西轉運使江西薦饑徵民積歲賦洞奏免之又民輸紬絹不中度者舊責以滿匹洞命計尺寸輸錢民以爲便

宋史

蔡挺字子政宋城人第進士調虔州推官仁宗召對便殿累官知南安軍提點江西刑獄提舉虔州鹽法自大庾嶺下南至廣州驛路荒遠室廬稀疏往來無所芘挺兄抗時爲廣東轉運使乃相與謀課民植松夾道以休行者江閩鹽賊率十百爲州縣害挺論所部與期使首納器甲原其罪得兵械萬計官鹽惡而價貴盜鹽善而價且下故私販日滋挺簡僚吏至淮轉新鹽以官數之餘畀之於是賊黨破散宿弊遂絕歲增賣鹽四十萬

宋史

謹案宋王革聞見近錄云江西舊酒鹽至州有餘悉輸於官漕舟沿江貨所附私鹽既盡遂益官物監諸鹽

舟沈之聲言風水每歲拋失十三四而盜取監臨私貨抵法枕藉於市蔡子正爲江西憲建言鹽至江西有出剩者乞據其數給江西價之半朝廷從之今數十年官物既罄盜竊而舟獲完歸刑法爲滅百世之利也申開浮淺之人或再減其直其弊如初云云視宋史爲詳

程邁字進道新安黟人登元符三年進士乙科徽宗時除提舉江西常平民有訟田者二十年不決邁閱其牘問訟者年幾何曰六十六邁曰爾所齎券乃慶歷三年時方年九歲安得妻財置產訟者歎以爲神曰早二十年遇之可以無訟歲旱饑募流民浚東湖及出常平粟以濟後爲忌者所中坐發廩踰數免官再起再罷紹興中差知信州信民罷訟吏巧於法邁獲奸痛治之境內懾服訟訴爲衰明年郡旣潦復旱蠲傷稼累禱輒應蠹抱稼以死歲乃大豐邦人爲作感應記歷發運使知鎮

江府兼沿江安撫使進徽猷閣直學士知饒州條畫寬恤三十許事揭於城門人情大悅乃奏乞蠲舟車征算增米價以來遠商察征商諸弊使不得爲梗未幾米暴集閱數至六十餘萬斛價爲之損半民食大足而羨餘

及於徽信二州

據明程敏政新安文獻志補

張俊字伯英鳳翔人紹興元年李成據江淮以俊爲江淮招討使俊聞命就道急趨豫章曰我已得洪州破賊決矣乃斂兵若無人者金鼓不動賊以大書牒來索戰俊以細書狀報之賊以俊爲怯俊諜知賊怠乃以岳飛爲先鋒楊沂中由上流徑絕生米渡出賊不意追奔七十里至筠州賊背筠河而陣俊用沂中計親以步兵當其前以精騎授沂中及陳思恭自山馳下夾擊賊大敗

復筠州臨江軍乘勝又復江州已而興國軍等處羣盜

聞俊兵至皆遁去

宋史

楊存中本名沂中字正甫代州崞縣人高宗賜今名紹興元年從張俊討李成諸將議欲分道進存中曰賊勢如此兵分則力弱又諸將位均勢敵非招討督之必不相爲用俊然之整軍至豫章存中率兵數十首破賊於玉隆觀追至筠州賊將夾河而營存中謂俊曰彼眾我寡擊之當用奇願以騎見屬公以步兵居前俊從之存中夜銜枚渡筠河出西山馳下擊賊後以步兵夾攻大破之乘勝追至九江成遁去遷宣州觀察使

宋史

韓世忠字良臣延安人建安范汝爲反以世忠爲福建江西荆湖宣撫副使領步卒三萬水陸並進日夜併攻

汝爲竄身自焚死世忠因奏江西湖南寇賊尙多乞乘勝討平廣西賊曹成擁餘眾在郴邵世忠旣平閩寇旋師永嘉若將就休息者忽由處信徑至豫章連營江濱數十里賊不虞其至大驚世忠遣人招之成以其眾降得戰士八萬遣詣行在

宋史

宋史

陳橐字德應越州餘姚人登政和上舍第紹興二年除江西運判瑞昌令倚勢受賂橐首劾罷之期年所按以十數至有望風解印綬者以母年高乞歸移知台州

史宋

胡世將字承公常州晉陵人崇甯五年進士以刑部侍郎出知洪州兼江西安撫制置使屬建昌兵變殺守卒

此一

作嬰城以叛世將以便宜發兵討平之宋史

史朱

岳飛字鵬舉相州湯陰人紹興元年張俊請飛同討李

成成將馬進犯洪州連營西山飛曰賊貪而不慮後若以騎兵自上流絕生米渡出不意破之必矣因請自爲先鋒重鎧躍馬潛出賊右突其陣所部從之進大敗走筠州飛抵城東賊出城布陣十五里飛設伏以紅羅爲幟上刺岳字選騎二百隨幟而前賊易其少薄之伏發賊敗走飛使人呼曰不從賊者坐坐而降者八萬餘人進以餘卒奔成於南康飛夜引兵至朱家山又斬其將趙萬成聞進敗自引兵十餘萬來飛與遇樓子莊大破成軍追斬進成走蘄州降僞齊相人張用寇江西飛以書諭降遂平江淮俊奏飛功第一加神武右軍副統制留洪州彈壓盜賊授親衛大夫建州觀察使建寇范汝爲陷邵武江西安撫李回檄飛分兵保建昌軍及撫州

飛遣人以岳宇幟植城門賊望見相戒勿犯賊黨姚達  
饒青偪建昌飛遣王萬徐慶討擒之升神武副軍都統  
制二年賊曹成擁眾十餘萬由江西歷湖湘據道賀二  
州飛以計討擊大破其黨成遂詣宣撫司降授武安軍  
承宣使屯江州甫入境安撫李回檄飛捕劇賊馬友郝  
通劉忠李通李宗亮張式皆平之三年春召赴行在江  
西宣諭劉大中奏飛兵有紀律人恃以安今赴行在恐  
盜復起不果行時虔吉盜連兵寇掠南安建昌諸郡帝  
乃專命飛平之飛至虔州固石洞擒賊酋彭友餘酋據  
洞自固洞高峻環水止一徑可入飛列騎山下令皆持  
滿黎明遣死士疾馳登山賊眾亂棄山而下騎兵圍之  
賊窘降其諸郡餘賊亦以方略破降之初帝以隆祐太

后震驚之故密令飛屠虔城飛請誅首惡赦脅從不許請至三四乃獲允人感其德繪像祠之餘寇犯袁州飛遣將討平帝手書精忠岳飛字製旗以賜投鎮南軍承宣使江南西路沿江制置使飛行師有紀律道出廬陵士卒託宿市廛黎明爲主人汎埽門宇洗滌釜盎而去其嚴肅如此

宋史舊志

李綱字伯紀邵武人自其祖始居無錫綱登政和二年進士第紹興五年除江西安撫制置大使兼知洪州至官振本路旱災乞差吳錫等軍一萬人充江西大使司軍馬仍令劉光世岳飛等軍分屯舒蘄黃三州與江西相表裏以資捍蔽又請置都統制一員節制江西閩廣三路以討虔州之賊遂遣兵擊周十隆等勝之尋以言

去著有制置江右錄等書

宋史李忠定奏議謹案網在洪州修其郡城橫截東

北隅入三里廢四門遂定其制見南昌府志

張守字子固常州晉陵人登崇甯元年進士第紹興八年知洪州兼江南西路安撫使入對時江西賊盜未息上問以弭盜之策守曰莫先德政伺其不悛然後加以兵因請出師屯要害既至部揭榜郡邑開諭禍福約以期限許之自新不數月盜平守以江右郡縣供億科擾上疏請蠲和買罷和糴上欲行之時秦檜方損度支爲月進且日憂四方財用之不至見守疏怒曰張帥何損國如是守聞之歎曰彼謂損國乃益國也徙知建康府卒諡文靖

宋史

趙子洎字正之燕王五世孫紹興初爲江西都轉運使

時建督府軍須浩繁子渚運饌不絕以功進寶文閣直

學士

宋史

芮輝字國瑞湖州烏程人煜弟紹興十八年進士與趙

子渚相繼爲轉運使卻四方聘幣斥其資置南昌養濟

院以卹貧者時以廉節稱

嘉靖林志

謹案舊志作芮輝字國器據厲鶚宋詩紀事

訂正國器輝見輝字也浙江通志作芮輝官至兵部尙書

劉琪字共父建州崇安人登進士乙科孝宗時以端明

殿學士奉外祠陳俊卿言琪正直有才肯任怨臣所不

及願留之詔改知隆興府江西安撫使人辭猶以六事

爲獻上曰卿去國不忘忠言行召卿矣至鎮首蠲稅務

新額及罷苗倉大斛屬邑奉新有復出租稅窮民不能

輸相率逃去反失正稅并奏除之累進觀文殿學士卒

贈光祿大夫謚忠肅琪精明果斷喜受盡言事有小失  
下吏言之立改爲參知政事時奏罷江西和糴臨數鎮  
民愛之若父母聞訃有罷市巷哭相與祠之者

宋史

程大昌字泰之徽州休甯人紹興二十一年進士除浙  
東提點刑獄徙江西轉運副使會歲歉出錢十餘萬緡  
代輸吉贛臨江南安夏稅折帛過饑民爲盜之源又遷  
吉州造船場於臺治以省費革弊凡吉舊欠皆捐之清  
江縣舊有破坑桐塘二堰以捍江護田及民居地幾二  
千頃後堰壞歲罹水患且四十年大昌力復其舊進祕

閣修撰

宋史 益公集

周

龔茂良字實之興化軍人紹興八年進士孝宗時知信  
州除直顯謨閣江西運判兼知隆興府上以江西連歲

大旱知茂良精忠以一路荒政付之茂良戒郡縣免積  
稅上戶止索逋發廩振贍以石文殿修撰再任疫癘大  
作命醫治療全活數百萬進待制敷文閣賞其救荒之  
功召對奏潢池弄兵之盜卽南畝負耒之民今諸郡荒  
田極多願詔監司守臣募人從便請耕民有餘粟雖驅  
之爲寇亦不從矣

宋史

汪大猷字仲嘉一字適齋明州鄞縣人紹興十五年進  
士高熙元年知隆興府江西安撫使有篙師害主人而  
據其女因有資財女聞大猷威名密告縣令大猷爲究  
治得主人夫婦尸於神祠旁冤始雪吉州民王氏父子  
以資得官冒佃官地武尉抑制之王怒訴於州尉不屈  
夜使人折尉足大猷奏其事黥配嶺海人皆快之

據宋史本

傳及鄴  
縣志補

沈璘字元質明州奉化人乾道進士爲江西轉運司幹  
辦公事或忌璘所學望風心議及與璘處了無疑閒

林  
志

李燾字仁甫丹稜人紹興八年進士淳熙中爲江西轉  
運副使置一路財賦都簿未幾召還乞令本路無廢此

書上曰卿不爲高論務在便民甚善

宋史  
舊志

王希呂字仲行宿州人乾道五年進士淳熙中爲江西  
轉運副使嘗作拳石記以示僚屬一幕官舉筆塗數字  
舉坐駭愕希呂覽之喜其不阿薦於朝居官廉潔至無  
屋可廬

宋  
史

趙善俊字俊臣太宗七世孫紹興二十七年進士孝宗

時知隆興府移江西轉運副使時朝廷議減月椿錢善  
俊言及州不及縣則縣仍迫取於民猶不減也宜一路  
通裁其額下之漕臣科郡縣輕重均減之又奏和買已  
是白科折變益加糜費其數視正絹反重併乞蠲減踪  
卒遇赦還者請刺充鋪兵可除民害所言多見用

宋史

辛棄疾字幼安齊州歷城人乾道閒遷倉部郎官提點  
江西刑獄平劇盜賴文政有功加祕閣修撰兩知隆興  
府兼江西安撫其再任安撫也值江右大饑詔任責荒  
政始至榜通衢曰閉糴者配強糴者斬次令盡出公家  
官錢銀器召官吏儒生商賈市民各舉有幹實者量借  
錢物速其責領運糴不取子錢期終月至城下發糴於  
是連橋而至其直自減民賴以濟時信州亦饑棄疾又

以米舟十之三予之

宋史謝案舊志名宦篇賢棄疾並有傳以留居銘山江右辛氏多

祖之故也然不及名宦傳之詳今去彼存此仍附注以不沒寓賢之蹟

陸游字務觀越州山陰人以蔭補登仕郎鎖廳薦送第一秦檜孫埴適居其次檜怒至罪主司明年試禮部復置前列檜顯黜之由是爲所嫉檜死始赴福州甯德簿後通判隆興府累遷江西常平提舉江西水災奏撥義倉振濟檄諸郡發粟以予民召還歷升寶章閣待制致

仕

宋史

程叔達字元誠徽之黟縣人第進士乾道四年爲江西轉運副使旋改江東漕熙九年除祕閣修撰知隆興府以所部多盜申嚴同惡及他盜捕告之令一夕郭外僧舍有寇其徒來告叔達免其罪犒之盡縛羣寇戶諸市

屬邑民田有流徙而汙萊者有不汙萊而業無主名者  
謂之逃閑歲賦十道二三叔達分遣縣官精敏者核欺  
占實百年蠹做一日蕩去州之材官曰親兵者千曰選  
中禁軍者亦千雜廛市居多驕放叔達爲築室三百餘  
區聚居之廩服給授惟時復請州置準備將一員以轄  
其眾晝訓夕警無敢譁者事聞上以其法下之百郡吉  
兵謀於牙門叔達以守臣與兵鈴不誠劾罷之揭賞禽  
賊皆伏誅軍政肅然一道惕息進集英殿修撰因任帥  
洪五年前後蠲除民賦爲緡錢二十三萬有奇爲米斛  
一十一萬有奇談者以爲多於王仲舒云十三年八月  
上忽宣諭執政程叔達隆興之政甚美與進敷文閣待  
制再因任歲或小旱每禱雨舉室不茹葷感召如響部

內頻歲有秋民歌之曰公來江西熟公去江西旱十四

年引疾丐祠去官之日如始至

據宋楊萬里所撰墓志銘補

張杓

舊志作杓誤

字定叟漢州綿竹人浚子以父恩授承奉

郎孝宗時差知袁州戢豪彊弭盜賊尉獲盜上之州杓

察知其枉縱去莫不怪之未幾果獲真盜甯宗嗣位升

龍圖閣學士知隆興府兼江西安撫使奉新縣舊有營

田募民耕種畝賦米斗五升錢六十其後議臣請鬻之

始征兩稅和買且加折變民重困杓悉奏蠲之

宋史謹案南

昌府志名宦傳誤以杓知隆興爲在孝宗時反謂舊志爲誤蓋未審宋史杓傳知隆興上有甯宗嗣位句也今

正

李誠之字茂欽婺州東陽人慶元中初釋褐爲饒州教

授遷江西轉運司幹辦使稱提會子第其物力高下輸

錢以斂之誠之以爲擾使者不悅曰商君之令猶能必行今乃齟齬如此誠之愀然曰使君儒者而欲效商君之所爲乎遂辭去使者遂謝罷合而後止

宋史忠義傳

趙希懌字伯和燕王八世孫淳熙十四年進士遷江西茶鹽提舉歲饑惡少聚劫希懌將自臨案幕屬力止之不聽曰希懌不出饑民終不得食且召亂矣遂行發粟振給擒首謀者治之其黨遂散升本路帥兼漕事黑風峒羅世傳寇郴陽奸民潛通賊陰濟以糧希懌捕誅之賊乏食乃去未幾李元礪寇郴陳廷佐寇南安復誘世傳與合劫掠至龍泉有何光世者能知賊動息希懌授光世策俾誘世傳誅元礪以自贖功未竟移知平江府其後世傳果縛元礪以獻廷佐勢孤亦降

宋史

沈作賓字賓王吳興歸安人以父任入仕監饒州永平  
監冶鑄堅緻又承詔造雁翎刀稱上意連進兩資中刑  
法科歷江西提刑司檢法官除寶謨閣學士江西安撫  
兼知隆興府奏部內南安康龍泉三縣迫近溪峒三  
縣令尉及近峒之砦曰秀州曰北鄉曰蓮塘并永新縣  
之勝鄉砦宜就委帥憲兩司擇才辟置量加賞格又乞  
詔諸道監司分詣州郡選禁軍精練閱改刺其懦弱者  
爲廂軍在郡搏錢二十餘萬緡僚屬請獻諸朝作賓謂  
平生未嘗獻羨以半歸帥司犒師半隸本府進顯謨閣  
學士致仕

宋史

趙汝讜字蹈中嘉定元年進士爲大理司農丞與史彌  
遠不合請外改湖南提舉常平易江西尋提點刑獄瑞

州大姓幸氏貪徐氏田不可得強取其禾終不與誣以殺婢寘徐獄徐訴其冤汝讜以反坐法黥竄幸氏籍其家幸氏走告急於中官徙汝讜湖南遷知溫州卒汝讜兄汝談字履常淳熙十一年進士添差江西安撫司幹辦公事遷提舉常平江西轉運判官嘗從朱子訂疑義十數條佐丞相趙汝愚定大策汝讜兄弟齊名天下稱爲二趙

宋史謹案白謝二志汝談汝讜並有傳然汝談無江西仕蹟嘉靖通志特以其與朱子講學而存之安志剛之是也今附著汝讜傳末

史彌鞏字南叔慶元府鄞縣人嘉定十年進士提點江東刑獄歲大旱饒信南康三郡大侵彌鞏謂振荒在得人乃釐戶爲五甲乙以等第振糶內爲自給丁糴戊濟凡全活一百一十四萬有奇饒州兵籍溢數供億不繼

請汰冗兵令下營門大譟乃呼諸校謂曰汰不當許自

陳敢諱者斬咸叩頭請罪諸營帖然廩給亦大省

宋史

陳塏字子爽嘉興人提點江西刑獄遷知隆興府兼江

西安撫使改知江州主管江西安撫司事有善政樂於

薦士軍民愛戴之

宋史

明一統志

謹案浙江通志

宋史

略異

陳韓字子華福州侯官人登開禧元年進士第紹定六

年進寶章閣待制知隆興府贛寇陳三槍據松梓山砦

出沒江西廣東所至殘殺韓遣官吏諭降賊輒害之乃

謂盜賊起於貪吏劾其尤者二人十一月詔節制江西

廣東福建三路捕寇軍馬十二月兼知贛州端平元年

正月進華文閣待制江西安撫使二月至贛斬將士張

皇賊勢及掠子女貨財者所至克捷分兵守大石堡截賊糧道遂破松梓山三槍與餘黨縋厓而遁韓親督諸將乘春瘴未生薄松梓山步騎夾擊縱火焚之賊巢蕩爲煙埃賊首張魔王自焚死斬首千五百級擒賊將十二得所掠婦女牛馬及僭偽服物各數百計三槍遁至興甯就擒檻車載隆興斬於市羣賊悉平進工部侍郎仍知隆興兼江西安撫使

宋史舊志原案林志韓傳有二月至贛斬將士張皋語

宋史本傳從征諸將齊敏李大聲而外並無張皋

豈因傳中有斬將士張皋賊勢語遂以皇誤舉邪

袁甫字廣微鄞縣人變子嘉定七年進士第一提舉江東常平時江閩寇迫饒信慮民情易動分榜諭安之移司鄱陽兼提點本路刑獄春夏雨久湖溢諸郡被水連請於朝給度牒二百道振恤盜起常山調他州兵千人

屯廣信以爲備行部問民疾苦薦循良劾姦貪決滯獄  
勅書院貴溪之南祠先儒陸九淵歲大旱請給度牒緡  
錢綾紙助振恤如前疫癘大作勅藥院療之前後持節  
江東五年所活不可數計據宋史本傳補謹案宋世  
江南東路舊志統轄職官惟錄西路今表仍之其江東  
使臣有功饒信諸郡者列其事於宦績錄表則仍闕不  
書以示  
限斷

魏了翁字華父邛州蒲江人慶元五年進士理宗紹定  
五年提舉江州太平興國宮端平二年以端明殿學士  
同簽書樞密院事督視京湖軍馬會江淮督府曾從龍  
以憂畏卒并以江淮付了翁又賜便宜詔書如張浚故  
事詔宰臣飲餞於闕外乃酌上下流之中開幕府江州  
申儆將帥調遣援師褒死事之臣黜退懦之將奏邊防

十事甫二旬召爲簽書樞密院事赴闕奏事時以疾力

辭不拜改資政殿學士官至福建安撫使卒贈太師諡

文靖

宋史謹案舊志了翁列九江名宦以未兼州職改隸於此

王埜字子文一字潛齋婺州金華人嘉定十二年進士

爲江西轉運副使知隆興府繼有他命時以米綱不便

就湖口造轉般倉請事畢受代

宋史詩紀事

吳淵字道父宣州甯國人潛兄嘉定七年進士累官知

隆興府江西安撫使兼轉運副使會歲大侵講行荒政

全活者七十八萬九千餘人徙知潭州湖南安撫使不

赴加敷文閣學士仍知隆興府安撫轉運副使如故丁

母憂服除進龍圖閣學士江西安撫使兼知江州尋爲

沿江制置副使兼提舉南康軍兵甲公事湖南峒寇蔓

入江右境破數縣袁洪大震淵命將調兵擒其渠魁亂

遂平

宋史

董槐字庭植濠州定遠人嘉定六年登進士第調靖安主簿嘉熙三年以直寶謨閣知江州兼都督府參謀流民渡江來歸者十餘萬眾議者謂軍興郡國急儲粟不暇民食槐曰民吾民也發吾粟振之胡不可至者如歸焉  
淳祐二年  
本紀作三年遷左司郎官進直龍圖閣沿江制

置副使兼知江州主管江西安撫司公事視其賦則吏侵甚下教曰吾莅州而吏猶爲盜不自悔吾且誅之吏乃震恐願自新槐因除民患害凡利有宜弛以利民惟恐不盡弛大計軍實常若敵至裨將不受命者斬以徇

軍中肅然

宋史

姚希得字逢原一字叔剛潼川人嘉定十六年進士理  
宗朝爲著作郎授江西提舉常平役法久壞臨川富室  
有賂吏求免者希得竟案其罪改提點刑獄加直祕閣  
轉度支員外郎移治贛州盜有僞號崔太尉者據石壁  
連結數郡劉老龍等聚眾焚掠一方騷擾希得指授方  
略不五旬平之

宋史

許月卿字太空徽州婺源人淳祐四年進士寶祐中董  
槐奏入江西庾幕尋改幹辦本道提舉常平公事待次  
六年不就使者史繩祖屢書起之既至遇黃萬石有獄  
賂使者左右枉其事月卿爭之賄乃不行於是下不受  
屈勢家訖無犯法者江右人號爲鐵符尋攝提舉事政  
尚廉平多所平反屬郡獄久不決者令郡縣以上皆一

旦遣之民以不冤移浙西罷職歸

據新安文獻志所錄許飛山屋先生行狀

補

米立淮人江西制置使黃萬石署爲帳前都統制元兵略江西立迎戰於江坊被執繫獄行省遣萬石諭之曰吾官階一牙牌書不盡今亦降矣立曰侍郎國家大臣立一小卒爾何足道但三世爲將食趙氏祿趙亡何以生爲立乃生擒之人與投拜者不同也萬石再三說之不屈遂遇害

宋史忠義傳

密伯廬州人累官權江西路副總管咸淳十年以閭門宣贊舍人爲江西都統是冬元丞相巴延下鄂州留右丞阿爾哈雅守之而將大兵東下明年二月朱禔孫遣高世傑取鄂阿爾哈雅以兵逆擊執世傑荆江口兵盡

潰半入江西江西制置黃萬石招集之且募甯都廣昌

南劍義兵千餘人盡以屬佑十一月元兵至隆興劉槃

兵敗萬石調佑兵援槃未至槃已降元兵徧撫州佑率

眾逆之進賢坪麾兵突戰進至龍馬坪元兵圍之數重

矢下如雨佑告其部人曰今日死日也力戰或有生理

眾咸憤厲自辰戰至日昃佑面中矢拔之復戰身被四

矢三槍眾皆死僅餘數十人佑乃揮雙刀斫圍南走前

渡橋橋忽中斷被執終不屈怡然就刑觀者皆泣下

宋史

忠義傳 豫章書 謹案巴延原作伯顏阿

爾哈雅原作阿里海牙俱依元史語解改正

謹案舊志有薛向李之純趙鼎張浚馬光祖趙葵六傳

向及之純傳所載非江西之事趙葵傳僅敘官階馬光

祖宋史本傳未言爲江西安撫其知降興係以運副兼

之舊志引史傳原文乃知建康府事不關江西今並刪

汰以昭核實惟光祖曾知餘干改依府志列饒州府宜

續又趙鼎張浚二傳亦無江西事實鼎傳治嘉靖林志

之誤述襄陽事尤與宋史本傳不合且復何與江西今亦竝從刪削夫趙鼎李綱張浚諸人爲南宋中興賢相原不藉方志爲之闡揚李綱制置江西經略措置具詳奏議且有制置江西錄一書今雖不存其籌策之勞可想故存綱而去鼎浚蓋惟以微實爲主初非於異代名流漫有軒輊也

元

達春

原作塔出

保喇之子也幼孤長善騎射至元元年入侍

世祖以功授淮東左副都元帥十三年遷江西都元帥十四年加賜雙虎符爲江西宣慰使尋改資政大夫中書左丞行中書省事初江西甫定帝命賑其城卽表言豫章諸郡皆瀕江霖潦泛溢無城必至墊溺賑之不便帝從之降附之初有謀叛者旣敗獲達春謂同僚曰撫治乖方之所致也夫豈無註誤止誅其渠魁盡釋餘黨瑞州張公明愬左丞呂師夔謀不軌達春廉知其誣曰

狂夫欲脅求貨耳若遽以喙味言上聞則大獄滋興株連及無辜且師夔旣居相職豈復爲狂妄之事猶豫不決彼將驚疑反生異謀矣乃斬公明而後聞帝是之十

七年入覲以疾卒於京師年三十七

元史

李恆字德卿西夏人至元十三年以左副都元帥從征江西下隆興及撫瑞建昌臨江諸路軍中有得宋相文天祥與建昌故吏民書者恆焚之人心乃安隆興帥府誣富民與敵連已誅百三十家恆還審其非罪盡釋之文天祥兵出興國縣連破諸邑圍贛州尤急或言天祥墳墓在吉州遣兵發之必下恆曰王師討不服耳豈有發人墳墓之理乃分兵援贛自率精兵潛至興國天祥走追至空坑降其眾二十萬十四年拜參知政事行省

江西

元史

江西通志卷三十三 人 統緒

許楫字公度太原忻州人年十五以儒生中詞賦選又

舉孝廉至京師丞相安圖

原作左丞

許衡深器重之累

官江西道提刑按察副使行省命招討郭昂討叛賊董

旗兵士俘掠甚眾楫詢究得良民六百口遣還鄉里尋

授中議大夫徽州總管終太中大夫東平總管

元史良史傳

賈居貞字仲明真定獲鹿人至元十二年以僉行省事

留鄂有惠政十五年遷江西行省參知政事未至民爭

千里迎訴時逮捕民因受宋二王文帖者甚急坐繫巨

室三百餘居貞至悉出之投其文帖於水火士卒有挾

兵入民家誣爲藏匿以取財者取人子女爲奴妾者皆

痛繩以法大水壞民廬居貞發廩振之南安李梓發拒

守居貞慮將帥出兵擾民親往諭之其眾聞居貞至皆散匿不復爲用梓發閉妻子一室自焚死比還不戮一人杜萬一亂都昌居貞調兵擒之有列巨室姓名百數來上云與賊連居貞曰元惡誅矣蔓延何爲命火其牒十七年朝廷再征日本造戰艦於江南居貞極言民困如此必致亂將入朝奏罷其事未行以疾卒於位贈推忠輔義功臣追封定國公

元史

張宏略字仲傑易州定興人至元十六年遷江西宣慰使會饒州盜起犯都昌宏略以爲饒雖屬江東與南康止一湖之隔寇不滅吾境必有相扇而起者乃使人直擣其巢穴生縛賊酋磔於市餘黨潰散下令曰不操兵者皆爲平民餘無所問頃之以疾歸亳後官河南參政

卒諡忠毅

元史

劉思敬濟南歷城縣人賜名哈巴爾圖至元十七年授

正奉大夫江西行省參知政事治吉贛盜民賴以安二

十年卒諡忠肅

元史

額森鼎爾輝和爾人

原作畏吾人

幼事世祖於潛藩從征吐

蕃雲南有功至元二十四年遷雲南行省平章政事尋

改江西巨盜鍾明亮爲害積年額森鼎爾討擒之成宗

卽位召還賜玉帶改陝西卒諡敏忠

元史

謹案額森鼎爾安志作葉仙

鼎已誤白謝二志易鼎爲鼎則尤舛矣今依元史語解改正

管如德黃州黃陂縣人爲宋江州都統制至元十二年

以城降世祖壯其勇稱爲巴圖賞賚優渥二十四年遷

江西行省參知政事破豪猾去姦吏居民大悅是時贛

汀二州盜起如德指揮諸將討平之脅從者多所全省  
二十六年遷江西行尙書省左丞時鍾明亮以循州叛  
命如德統四省兵討之如德遣使諭以禍福賊感其誠  
信卽擁十餘騎詣贛州石城縣降平章鄂囉齊原作奧魯赤  
欲殺之如德聞之曰皇元仁厚未嘗殺降明亮叛人何  
足惜所重者信不可失耳年四十有四卒於軍贈江西  
行省左丞平昌郡公諡武襄元史

孚世安字彥豪西夏人至元間僉江西行尙書省事時  
信豐寇起冒大雨夜行五十里黎明抵賊所出其不意  
捕斬之以功升行省參知政事悉平寇黨一十七寨南  
豐廣昌賊繼起世安首散民丁歸農遣官軍出屯居民  
入郭厚撫其復業者又移檄諭賊以禍福越三日賊果

納械服罪乃集眾誅首惡六人餘悉資遣之後進行省

平章政事

嘉靖林志

孟古岱

原作忙兀台

蒙古塔塔爾

原作達達兒

氏至元二十七年

江西平章鄂囉齊

原作奧魯赤

不稱職孟古岱以特命爲丞

相兼樞密院事出鎮江西謹約束鋤强暴尊卑殊服軍

民安業威德並著在官四十日卒

元史

貝降

原作拜降

北庭人至元二十七年遷江西行尚書省都

鎮撫適徭獠擾邊貝降從丞相孟古岱

原作忙兀台

討定之

官至工部尚書卒諡貞惠

元史

察罕西域巴喇勒哈

原作板勒紇

城人賜姓白氏至元二十

八年授樞密院經歷未幾從鄂囉齊

原作奧魯赤

移治江西

甯都民某言某鄉石上雲氣五色有物焉視之玉璽也

不以兵取恐爲居人所有眾惑之察罕曰妄也是必構  
害仇家者覈問之果然前後從鄂囉齊出入湖廣江西  
兩省凡二十一年多著勳績

元史

史弼字君佐一名塔爾渾

原作塔刺渾

蠡州博野人通國語

膂力絕人從丞相巴延

原作伯顏

南征論弼功第一至元十

七年南康都昌盜起弼往討誅其親黨數十人脅從者  
宥之江西宣課司稅及民米米商避去民皆閉門罷市  
弼立弛其稅民乃復安元貞元年拜榮祿大夫江西等  
處行中書省右丞三年升平章政事封鄂國公

元史

董士選字舜卿真定藁城人成宗時拜江西行省左丞  
贛州盜劉六十僞立名號聚眾至萬餘朝廷遣兵討之  
主將觀望退縮吏又因以擾民賊勢益盛士選請自往

眾欣然託之卽日就道不求益兵但率掾史李霆鎮元明善二人持文書以去眾莫測其所爲至贛捕官吏害民者治之進至興國縣去賊巢不百里命擇將校分兵守地待命察知激亂之人悉寘於法復誅奸民之爲囊橐者於是民爭出請自效不數日遂擒賊魁散餘眾歸農軍中獲賊所爲文書旁近郡縣富人姓名具在霆鎮明善請焚之民心益安遣使以事平報於朝但請黜賊吏數人而已不言破賊事廷議歎其知體不伐拜江南行御史臺中丞廉威素著不嚴而肅入拜御史中丞久之出爲江西行省右丞士選在江西以屬掾元明善爲賓友旣又得吳澄而師之延虞汲於家塾以教其子及遷南行臺又招汲子集與俱後又得范梈等數人皆以

文學顯故世稱求賢薦士者必以董氏爲首每一之官

必賣先業田廬爲行貨故老而益貧子孫不與布衣之

士仕者往往稱廉吏云

元史 舊志 原案 吳澄 董忠宣 神道碑 云 公去 贛民 數萬 遮道

拜送曰 父母生我於有生之初 令公生我於既死之後 我無報德 惟天能報公也 遂立生祠祀公焉

元明善字復初大名清河人弱冠游吳中以能文章名

董士選爲江西左丞辟爲省掾會贛州賊劉貴反明善

從士選將兵討之擒賊三百人明善議緩誅得全活

者百三十人一日將佐白宜多戮俘獲及尸一切死者

以張軍聲明善固爭旣又得賊所書贛吉民丁十萬於

籍有司喜欲滋蔓爲利明善請火其籍以滅迹二郡遂

安升掾南行臺累官至禮部尙書翰林學士至治二年

卒於位追封清河郡公諡文敏

元史

郭貫字安道保定人才行見推爲南康路經歷累遷  
僉湖南肅政廉訪司事大德五年自湖北道遷江西道  
肅政廉訪司振恤饑民有惠政入爲御史臺都事

元史

敬儼字威卿其先河東人後徙易水至大元年授左司  
郎中擢江南諸道行御史臺治書侍御史皇慶二年拜  
江西等處行中書省參知政事舊俗民有爭往往越訴  
於省吏得並緣爲奸利訟以故繁儼下令非有司不得  
侵民訟事遂簡詔設科舉儼薦臨川吳澄金陵楊剛中  
爲考試官得人爲多其年冬移疾居真州除江南諸道  
行御史臺侍御史泰定元年改行御史臺中丞皆不赴  
累官中書平章政事卒諡文忠

元史

許有壬字可用湯陰人延祐二年進士第至治二年轉

江南行臺監察御史行部至江西會廉訪使苗好謙監焚昏鈔檢視鈔者日至百餘人好謙恐其有弊痛鞭之人畏罪率剔真爲僞以迎其意管庫吏而下榜掠無全膚迄莫能償有壬覆視之率真物也遂釋之凡勢官豪民人畏之如虎狼者有壬悉擒治以法部內肅然召拜監察御史至中書左丞卒諡文忠

元史

田贊濟甯人爲肅政廉訪司屬官之長參貳得清江范梈志合德同以苦澹自持清白自勵於是江西之憲職

大振

吳卓  
疎集

岳桂字止所一字兼山輝和爾人泰定四年授江西等處行中書省參知政事進榮祿大夫集賢大學士至順二年除行省平章時有誣告富民負永甯王官帑銀八

百餘錠者中書遣使諸路徵之使至江西岳柱曰事涉  
誣罔不可奉命僚佐重違宰臣意岳柱曰民惟邦本傷  
本以斂怨亦非宰相福也令使者以此意復命時雅克  
特穆爾爲丞相聞其言感悟命刑部詰治得誣罔狀罪  
誣告者若干人宰相以奏帝嘉之賜幣帛及上尊酒史元  
張仲儀字伯威絳陽人至順間爲江西行中書省左右  
司都事豫章歲凶民掘野鼠食餓殍橫道因聯袂爲旗  
執棘矛集城下將爲變眾憚不敢往仲儀單騎出呼曰  
爾等甯饑死乎兵死乎我張都事也敢害者前民皆泣  
拜散去卽還言於省臣大發倉廩振之賴以活者萬數  
大姓蕭鄧以武斷自豪州縣踵門受事顏色小異輒縮  
縮不敢進小民重足立戒毋敢高聲語仲儀皆置於獄

聞者到羊豕相慶曰吾屬始安枕矣擢撫州路總管到

官一日乞休歸

宋文憲集

王英字邦傑益都人性剛果有大節膂力絕人善用雙刀人號之曰刀王元貞元年以千戶從左丞董士選討擒大山賊劉貴二年討永新安福二州賊皆平之延祐二年甯都賊起行省命英率各萬戶軍討之屢戰皆勝斬獲不可勝數元統元年授懷遠大將軍同知海北海南宣慰司事至元間寇起潮漳等州詔令江西行省右丞雅克特穆爾原作燕帖木兒討之方是時英已致仕平章政事巴咱爾原作伯撒里謂僚佐曰是非刀王不可迎致之英曰國家有事吾雖老其可坐視乎據鞍橫槊精神飛動馳赴焉及賊平英功居多

元史

納琳

原作納麟

河西人高睿子大德六年用薦入備宿衛天

歷二年爲江西廉訪使南昌歲饑行省難於發粟納琳

曰朝廷如不允我當以家貲償之乃出粟振民全活甚

眾平章政事巴克實呼圖克

原作把失忽都

貪縱不法納琳劾

罷之元統初爲江南行臺治書侍御史尋升中丞至正

中屢任江西行臺御史大夫總制江浙江西湖廣三省

軍馬

元史

李彥古雲中人至元三年爲江西僉憲分巡吉贛南安

三郡攬轡所至先聲肅然冰檠自持歌頌載道未幾除

江南行御史臺

贛州府志

桑嘉依

原作星吉

字吉甫河西人自宣政院使出爲江南行

御史臺御史大夫時承平日久內外方以觀望爲政桑

嘉依獨持風裁御史行部必敕厲而遣之湖東僉事三寶珠儒者也性廉介所至搏貪猾無所貸御史有以私請者拒不納則誣劾之章至桑嘉依怒曰若人之廉孰不知之乃敢爲是言邪卽奏杖御史白其誣至正十一年汝潁妖賊起桑嘉依自湖廣平章入見具陳賊本末帝大喜命賜食時宰不悅奏爲江西行省平章政事員外置桑嘉依至江東詔令守江州時江州已陷賊據池陽太平官軍止有三百賊號百萬眾皆欲走桑嘉依曰畏賊而逃非勇也坐而待攻非智也若皆有妻子財物縱逃其可免乎乃貸富人錢募人爲兵先是行臺募兵人給百五十千無應者至是桑嘉依募兵人五十千眾爭赴之一日得三千人乃具舟楫直趨銅陵克之又破

賊白馬灣躡至白沙賊盡殪擒其渠魁奪船六百艘軍聲大振遂復池州及石埭諸縣又大破賊於清水灣進復湖口縣克江州留兵守之命王維恭柵小孤山而自據鄱陽口綴江湖要衝圖恢復時湖廣已陷江西被圍淮浙亦多故卒無繼援之者日久糧益乏士卒咸困或曰東南完實盍因糧以圖再舉桑嘉依曰吾受命守江西必死於此眾莫敢復言有頃賊船四集官軍力戰死且盡桑嘉依從子拜哈原作伯不華與親兵數十人死之猶堅坐不動賊發矢射之乃昏仆賊素聞桑嘉依名不忍害昇置密室至旦乃蘇賊羅拜爭饋以食桑嘉依斥之遂不復食凡七日乃自力而起北面再拜曰臣力竭

矣遂絕年五十七元

史

道通

原作道童

高昌人自號石巖至正十一年以平章政事

行省江西是年賊起蘄黃平章塔奇勒布哈將兵捍江

州土寇蠡起道通素不知兵倉皇無所措左右司郎中

布延布哈

原作普顏不花

曰今賊勢衝突城中無備萬一失守

奈何有章巴延

原作章伯顏

左丞者致仕居撫州其人熟知

軍務宜以便宜禮請之使署本省左丞專主軍旅事乃

有濟道通從其言巴延亦欣然爲起曰此我報國之秋

也至則與布延布哈設禦敵計甚悉明年正月湖廣陷

塔奇勒布哈由江州遁還二月布延布哈將兵往江州

至石頭渡遇賊戰敗道通聞之大恐卽懷印遁走布延

布哈還與巴延定爲城守之計後數日道通始自南昌

民家來歸遂議分門各守以備敵三月賊眾圍城城中

置各廂官及各巷長晝夕堅守眾心翕然道通素恤民  
善任使民多爲之用以故圍城兩月無離志道通密召  
死士數千人面塗青抹黃額衣黃衣爲前鋒別選精銳  
爲中軍募助陣者殿後命萬戶章托音布拉噶岱領之  
夜半開門伏兵柵下黎明鉦鼓大震因奮擊賊賊驚以  
爲神敗走遂乘勝擣其營復分兵埽其餘黨是時章巴  
延布延布哈之功居多巴延尋以疾卒朝廷以道通捍  
城有功加大司徒開府仍錫龍衣御酒旣而命琳沁巴  
勒爲左丞和尼齊爲右丞同將兵來江西琳沁巴勒旋  
卒道通屬和尼齊平富瑞二州分鎮其地適歲大旱公  
私匱乏道通借江浙米數十萬石鹽數十萬引與軍民  
約三日人糴官米一斗入昏鈔二貫又三日買官鹽十

斤入昏鈔二貫民皆便之按堵如故十八年夏四月陳友諒復攻江西時和尼齊已升平章加營國公便宜得專兵柄與道通積不相能且貪忍失將士意見城且陷遂夜遁去道通亦棄城退保撫州路欲集諸縣義兵圖克復而勢已不可爲因歎曰吾爲元朝大臣官至極品今城陷不守尙何面目見人乎適賊追者至道通欲迎敵渡水未登岸賊眾乘之遂爲所害事聞賜諡忠烈元

謹案史傳於道通多微辭以琳沁巴勒傳證之其人亦庸臣也舊志刪節失實今依史文錄之觀過知仁晚

節可

琳沁巴勒

原作亦憐眞班

西夏人性剛正動有禮法元統至元

間官江南行臺御史大夫至正十二年自江浙行省左丞相移江西於時妖寇由斬黃陷饒州饒之屬邑安仁

與龍興接境其民皆相挺爲亂琳沁巴勒道出安仁因駐兵招之來者厚加賞賚不從者命子哈喇多爾濟與江西左丞和尼齊等乘高縱火攻散之餘千久爲盜區亦聞風順服先是江西行省平章政事道通原作道童以寬容爲政軍民懈弛琳沁巴勒至風采一新威聲大振所在羣盜咸謀歸款矣十四年八月以疾卒於官所部爲之喪氣事聞贈推忠佐運正憲秉義同德功臣追封齊

王謐文獻

元史

布延布哈

原作普顏不花

字希古蒙古氏倜儻有大志至正五

年由國子生登右榜進士第一人授翰林修撰遷江西行省左右司郎中蘄黃徐壽輝來寇布延布哈戰守之功爲多語在道通傳十六年除江西廉訪副使頃之召

還後以山東行省平章全家死益都之難

元史忠義傳

廉和斯哈雅

原作廉惠山海牙

字公亮輝和爾人至治元年登

進士第歷僉江西廉訪司事升江南行御史臺經歷至

正間遷江西行省右丞時所隸郡縣多陷於賊乃與平

章政事司徒道通

原作道童

協謀殫力以定守禦招捕之策

就除本道廉訪使

元史

沁布阿咱爾

原作全善卷撒里

字子仁高昌人爲贛州路達魯

噶齊發摘奸惡一郡肅然至正十一年潁州盜起卽修

築城壘旬月之間守禦之具畢備於是發公帑募勇士

得兵三千人日練習之皆可用屬邑有爲賊所陷者輒

遣兵復之境內悉安十六年以功拜江西行省參政分

省於贛十八年江西下流諸郡皆爲陳友諒所據乃與

總管噶海濟

原作哈海赤

戮力同守友諒遣其將幸文才率

兵圍贛使人脅之降沁布阿訥爾斬其使日擐甲登城

拒之力戰凡四月兵少食盡義兵萬戶瑪哈瑪迪沙

原作

馬合沙

欲舉城降賊沁布阿訥爾不從遂自刎事聞朝廷

贈諡曰愷哀

元史忠義傳

巴延布哈德濟

原作伯顏不花的斤

字蒼崖輝和爾氏倜儻好學

初用父多喇德濟賡同知信州路事至正十七年擢江

東道廉訪副使守禦衢州十八年十二月陳友諒遣其

黨王奉國等號二十萬寇信州明年正月巴延布哈德

濟自衢引兵援焉及至遇奉國城東力戰破走之守將

聞其至羅拜前迎後數日賊復攻城乃大饗士卒約曰

不用命者斬命大都閫將阿蘇諸軍及民義爲左翼出

南門高義范則忠將信陽一軍爲右翼出北門自與呼圖克布哈將沿海諸軍爲中軍出西門部伍旣整因奮擊賊營斬首數千級幾禽奉國賊援突至先入賊營之軍咸沒勢將殆呼圖克布哈復勒兵力戰大破之二月友諒弟友德營於城東繞城植木柵攻益急又遣僞萬戶周伯嘉誘降高義給呼圖克布哈等見奉國呼圖克布哈信之率則忠等十人往至則盡爲賊囚明日奉國復令高義來巴延布哈德濟時坐城上見義單騎至謂之曰汝誘十帥無一人還今復來誘我邪頭可斷足不可移乃斬高義由是日夜鏖戰糧盡矢竭軍民惟食草苗茶紙旣盡括韉底煮食之又盡掘鼠羅雀及殺老弱以食五月大破賊兵六月奉國親來攻城晝夜不息者

踰旬賊皆穴地百餘所或魚貫梯城而上巴延布哈德

濟麾兵拒之已而士卒疲不能戰萬戶奎瑪里原作額馬兒

以城叛城遂陷巴延布哈德濟自刎死先是巴延布哈

德濟之援信州也嘗南望泣下曰我爲天子司憲城之

危急忍坐視乎所念者太夫人耳卽日入拜其母鮮于

氏曰兒今不得事母矣母曰爾爲忠臣吾死何憾巴延

布哈德濟因命子額森布哈奉其母聞道入福建以江

東廉訪司印送行御史臺遂力守孤城以死元史忠義傳謹案

本傳信州之陷同死者尚有鎮南王子大勝努判官席

閏參謀海瑤丹部將蔡誠將廣義兵陳受等其事並烈

附注以存其人托里布哈原作朵里不花字端甫蒙古人陳友諒陷江西詔拜

江西行省平章政事與平章阿爾烏遜原作阿等分道

進討遂泛海南下趨廣東駐師揭陽降土寇金元祐英  
肇欽連諸郡皆附且治兵由梅嶺以圖江西俄而元祐  
有異志令其子榮率外賊突入奪符信殺官吏變起倉  
卒眾莫能支托里布哈與參政楊泰元等勒兵拒戰賊  
來益眾托里布哈爲鎗所中創甚其子達蘭布哈原作達蘭  
不率麾下力抗死之托里布哈遂被執擁至太平橋罵  
不絕口爲賊所殺其妻布延氏原作卜顏氏妾高麗氏在側  
不去皆大罵曰我平章遇爾父子厚矣爾父子何暴逆  
至此亦皆遇害部將哈奇爾原作哈乞吳布延原作吳普顏阿拉  
克布哈原作阿不花岱布哈原作岱不花等俱戰死元史忠義傳  
同同蒙古人江西廉訪司經歷在官有能名陳友諒攻  
陷郡城與賊遇於合同巷罵賊而死豫章書

王艮字止善紹興諸暨人爲江西行省左右司員外郎吉之安福有小吏誣民欺隱詭寄田租九千餘石初止八家前後數十年株連至千家行省數遣官按問吏已伏虛誑而有司喜功生事者復勒其民報合徵糧六百餘石憲司授詔條革去終莫能止艮到官首言是州之糧比元經理已增一千一百餘石豈復有欺隱詭寄者乎準憲司所擬可也行省用艮言悉蠲之

元史良吏傳

薩里雅克圖薩

原作十里牙克思

爲江西行省理問江西於諸

省號多獄訟朝廷遣省臺行郡邑疏決囚禁薩里雅克圖薩在行龍興民與族兄弟及養子飲博有不勝者首之有司坐以羣博之法薩里雅克圖薩以家人自首當免釋之高安民有盜叔器物者父首實有司仍準盜論

薩里雅克圖薩例以親屬相爲盜得免瑞州民兄弟治  
團兄腹痛遽沒爪甲青黑母疑其婦與里人某爲姦聞  
縣執訊誣服繫獄六年每錄問其詞輒異最後上高尹  
讞得死者自食菰子中毒狀以聞薩里雅克圖薩按之  
中格遂平反其獄人稱神明

嘉靖

張昇建陽人以神童舉入官監官至江西儒學提舉至  
正閒陳友諒據豫章偪取諸司印綬昇曰誰能苟生辱

名投印井中不食死

福建通志

謹案舊志有蒙古歹傳據周密癸辛雜識僅載劉會孟  
命題一事及祭蒙古歹文十六字而已官闕政事皆所  
不詳且蒙古歹卽忙兀台之異文俱爲孟古岱譯音  
之誤非有兩人舊志旣爲忙兀台立傳此應從刪

江西通志卷一百二十六